



PRESENTACIÓN

I. PRESENTACIÓN

A presente Memoria reflicte os Orzamentos iniciais das catro deputacións de Galicia para o ano 2023, de acordo ao disposto na disposición adicional terceira do Estatuto de Autonomía de Galicia, que establece que os orzamentos das deputacións provinciais galegas uniranse aos da Xunta, dentro do marco xeral de coordinación coas administracións locais de Galicia.

Esta Memoria pretende, ser un instrumento máis de coñecemento da realidade das facendas locais, neste caso do ámbito provincial, e proporcionar unha descrición dos orzamentos sinxela e sintética.

A Memoria soamente recolle a través de táboas e gráficos as principais magnitudes orzamentarias, divididas en dúas partes: ingresos e gastos, incluíndo unha serie coa evolución de catro variables principais, como o total do orzamento, os ingresos tributarios, os gastos de persoal e as operacións de capital, ao longo dos nove últimos anos (2015-2023).

Tamén se describen as finalidades dos gastos segundo a estrutura de programas, destacando as principais áreas e políticas a nivel do conxunto das catro deputacións.

Engádense ao final os principais indicadores en termos de contabilidade nacional dos dous últimos anos.

1.1. ORZAMENTOS DE 2023 DAS DEPUTACIÓNS PROVINCIAIS DE GALICIA

Os orzamentos que se presentan neste documento son os aprobados como iniciais para o ano 2023 das catro deputacións galegas, presentados aquí de xeito sistemático e conxunto, coa mesma metodoloxía das memorias das deputacións dos anteriores orzamentos.

Realizarase unha análise dos orzamentos de cada unha das catro deputacións provinciais, así coma do orzamento conxunto do ano 2023, que acompañan aos orzamentos da Comunidade Autónoma de Galicia para o mesmo exercicio. A fonte de información son os orzamentos das entidades analizadas, sendo esta Memoria unha breve presentación agregada dos datos contidos neles. Recoméndase, para calquera dúbida, consultar a documentación completa que figura publicada nas páxinas web de cada deputación provincial. Con motivo dos cambios legislativos dos últimos anos no eido orzamentario, sintetízanse en primeiro lugar as normas que regulan as facendas locais e os seus orzamentos.

Legislación aplicable:

- Lei 7/1985, de 2 de abril, lei reguladora das bases de réxime local, modificada pola Lei 27/2013, de 27 de decembro, de racionalización e sustentabilidade da Administración local (LRSAL)
- R.D. legislativo 2/2004, de 5 de marzo, do texto refundido da lei reguladora das facendas Locais (artigos 162 a 171)
- Lei orgánica 2/2012, de 27 de abril, de Estabilidade orzamentaria e Sustentabilidade Financeira, modificada pola LO 9/2013 do 20 de decembro de control de débeda comercial no sector público, sendo de aplicación o R.D. 1463/2007, de 2 de novembro, REO, polo que se aproba o regulamento de desenvolvemento da Lei 15/2001, de 12 de decembro, de estabilidade orzamentaria, na súa aplicación ás Entidades locais
- R.D. 1463/2007, de 2 de novembro, polo que se aproba o Regulamento da LXEP
- R.D. 500/1990, de 20 de abril, regulamento orzamentario

Os orzamentos preséntanse segundo o disposto na Orde 3565/2008 do 3 de decembro, que establece a estrutura dos orzamentos das entidades locais, modificada pola Orde 419/2014, do 14 de marzo.

No que respecta aos *ingresos*, atenderase ao ANEXO IV relativo á clasificación económica do ingreso, isto é, diferenciando entre as operacións correntes, as de capital e as financeiras, de acordo coa estrutura de capítulos, artigos, conceptos e subconceptos.

Con respecto aos *gastos*, os estados de gastos dos orzamentos das entidades locais clasificaranse cos seguintes criterios:

- Por programas (dentro da mesma os gastos clasifícanse por Área de gasto / política de gasto / grupo de programa / programa de gasto)
- Por categorías económicas (agrupando os créditos por capítulos separando as operacións correntes, as de capital e as financeiras)
- Opcionalmente, por unidades orgánicas (non se recolle este criterio nesta memoria)

A clasificación dos gastos especifícase nos anexos I ao III. No primeiro deles establécese a clasificación por programas, no segundo a táboa de equivalencias coa clasificación da normativa anterior (empregada nos orzamentos das EELL anteriores ao exercicio 2010) e finalmente, o anexo III refírese á clasificación económica dos gastos.

Nesta memoria soamente se presentan os gastos coas dúas clasificacións obrigatorias: por categorías económicas e por programas.

Os datos dos orzamentos están expresados en euros correntes de cada ano.

Para abordar a análise dos orzamentos das deputacións galegas procederase da seguinte maneira:

- Farase unha análise diferenciada dos ingresos e dos gastos (nos apartados II e III respectivamente)

- Para cada un dos compoñentes do orzamento (ingresos e gastos) realizarase unha primeira aproximación das características xerais dos orzamentos, tanto de cada deputación coma do agregado para toda Galicia; en segundo lugar, analizaranse as variables de ingresos en termos per cápita, observando as principais diferencias entre deputacións; en terceiro lugar realizarase unha análise da evolución dos ingresos e gastos dende o ano 2015 á actualidade; e finalmente, nun cuarto apartado, recolleranse os orzamentos de ingresos e gastos, respectivamente, para cada deputación

- Finalmente, no apartado IV da presente memoria, recóllense os principais indicadores en termos de contabilidade nacional, empregando a metodoloxía do sistema europeo de contas 2010 (SEC 2010) e tendo en conta a consolidación co sistema anterior de 1995 (SEC 1995).

Os orzamentos aquí reflectidos son os resultantes da consolidación entre os das deputacións e os organismos autónomos, segundo o disposto no artigo 147.1.c. da Lei 39/1988 e o artigo 12.b. do R.D. 500/1990, unha vez descontadas as transferencias internas.

Ao respecto, convén resaltar que desde o orzamento de 2015, producíronse importantes cambios, pola aplicación do principio de racionalización da administración e dos recursos públicos, coa simplificación da estrutura organizativa.

Neste informe os datos orzamentarios son os seguintes:

1. Deputación da Coruña. Orzamento: 207.198.000,00 €
2. Deputación de Lugo. Orzamento: 110.614.887,32 €
3. Deputación de Ourense. Orzamento: 90.970.000,00 €
4. Deputación de Pontevedra. Orzamento: 181.633.895,00

